



Subsidi tiket penerbangan domestik diperluaskan - MOT

Oleh Essa Abu Yamin - Oktober 6, 2023 @ 11:21am
essabuyamin@bh.com.my

KUALA LUMPUR: Inisiatif bantuan subsidi pembelian tiket penerbangan bagi laluan domestik di antara Semenanjung, Sabah, Sarawak dan Labuan, kini diperluaskan kepada pelajar politeknik dan kolej komuniti di bawah Kementerian Pendidikan Tinggi (KPT) serta pelajar matrikulasi dan Institut Pendidikan Guru (IPG) di bawah Kementerian Pendidikan Malaysia (KPM) mulai hari ini.

Kementerian Pengangkutan (MOT) dalam kenyataannya, memaklumkan susulan itu pelajar politeknik, kolej komuniti, matrikulasi dan IPG boleh membuat semakan kelayakan mereka menerusi laman sesawang MOT di (<https://subsidiudara.mot.gov.my/>).

"Selepas membuat semakan, pelajar yang layak boleh membuat permohonan bantuan subsidi pembelian tiket penerbangan daripada mana-mana satu syarikat penerbangan seperti Malaysia Airlines (termasuk MASwings dan FireFly), AirAsia, Batik Air dan MYAirline, yang dipilih pelajar melalui laman sesawang syarikat penerbangan terbabit.

"Sekiranya pelajar didapati tidak layak, pelajar boleh membuat semakan dan rayuan kepada KPT atau KPM melalui institusi pendidikan masing-masing," katanya.

Kenyataan berkenaan menyatakan, setakat ini, pelajar yang layak hanya mereka yang berdaftar dengan politeknik, kolej komuniti, matrikulasi dan institut pendidikan guru sehingga sesi akademik 2022/2023 serta belum menamatkan pengajian selepas sesi akademik berkenaan.

"Selepas menerima permohonan terbabit, syarikat penerbangan akan mengeluarkan baucar digital bernilai RM300 kepada pelajar sebagai 'credit shell' untuk membeli tiket penerbangan.

"Sekiranya harga tiket yang dibeli adalah kurang daripada RM300, baki baucar digital akan kekal dalam 'credit shell' dan boleh digunakan untuk pembelian tiket seterusnya," katanya.

Jelasnya, tarikh akhir penebusan baucar untuk pembelian tiket penerbangan adalah pada 31 Disember 2023.

Bagaimanapun, pembelian tiket penerbangan untuk perjalanan selepas tarikh akhir penebusan baucar adalah dibenarkan.